

Uunga siunnersuut: Qimminik qimuttunik kiisalu qimmeqarneq qitsuuteqarnerlu pillugit Inatsisartut inatsisaat nutaaq

(Aalisarnermut, Piniarnermut Nunalerinermullu Naalakkersuisoq)

Saqqummiussissut**Siullermeerneqarnera**

Matumuuna Naalakkersuisut sinnerlugit qimminik qimuttunik kiisalu qimmeqarneq qitsuuteqarnerlu pillugit Inatsisartut inatsisissaat nutaaq saqqummiutissavara. Siunnersuutip malitsigisaanik qimuttunik qimmeqarnermi, nalinginnaasumik qimmeqarnermi qitsuuteqarnermilu maleruagassat arlalitsigut nutarterneqarput ullutsinnut naleqqussarlugit uumasullu atugarissaarnissaat qulakkeerniarlugu.

Inatsisissatut siunnersuut una qimuttunik qimmeqarnermi nalinginnaasumillu qimmeqarnermi qitsuuteqarnermilu maleruagassat ataatsimuulersinnissaanik naalakkersuinikkut tamakkiisumik kissaateqartoqarneranik aallaaveqarpoq, taamaasiortoqarneratigut innuttaasut, suliffeqarfii pisortallu suliffeqarfii suliassa qarfimmu tassunga tunngatillugit maleruagassanik atuuttunik sukkanerusumik takunnissinnaalersillugit. Ilaatigut kommunit arlallit uumasunut nakorsa qarnikkut inuussutissalerinermullu oqartussanut saaffiginnittarsimapput maleruagassat inatsisini assigiinngitsuni nassaariartarnerisa pisariunersuat naammagittaalliutigalugu, ilaatigut oqaatigineqarluni innuttaasut piaarinngikkaluarlutik inatsisunik unioqqutitsisarnerinut tamanna peqqutaataaasoq. Tamatuma saniatigut kommunit arlallit inatsisit atuuttut nutarterneqarnissaat kissaatigisarsimavaat, suliassa qarfiit arlallit ullutsinnut naleqqussarneqarnissaat aatsaat taamak pisariaqartigilermat. Ilaatigut tassani pineqarput qimminik angalaannartunik tigusiarnerni toqutsinernilu akiliuteqartitsisalersinnaanissamut periarfissat kiisalu qimminut qimuttunut tunngatillugu sisamanik qaammateqalernerini pitussimasalernissaanik piumasaqaateqalernissaq, maannamut arfinilinnik qaammateqalersimagaangamik pitussimasarnissaanik piumasaqaat atorunnaarlugu. Tamatuma saniatigut nunatsinni uumasut atugarissaarnerulernissaat anguniarlugu nutaanik aalajangersaanissaq pisariaqarpoq.

Inatsisip uuma siunertaraa qimmit qimuttut peqqissuunissaannik tunngavissaqartuarnissaq kiisalu qimmit qitsuillu Kalaallit Nunaanniittut illersorneqarsinnaasumik pineqartarnissaasa qulakkeernissaa. Uani inatsimmi aalajangersakkani uumasunut tunngatinneqartut taamaallaat qimminut qimuttunut, qimminut qitsunnullu tunngasuupput. Uumasunik allanik illersuinermit tunngasut Uumasunik Illersuinermit Inatsimmi ilaatinneqarput, soorluttaaq qimminut qimuttunut, qimminut qitsunnullu tunngasut aamma inatsimmi tassani ilaatinneqartut. Qimminik qimuttunik piginnittut, qimminik piginnittut qitsunnullu piginnittut taamaasillutik inatsimmi uani piumasaqaataasut maliutigalugit Uumasunik Illersuinermit Inatsimmi piumasaqaataasut malittussaavaat.

Inatsit una aqqutigalugu qimminik qimuttunik, qimminik qitsunnullu suliarinnittarnermi maleruagassat annertusineqassapput, qimminik qimuttunik qeqertani akuerineqarsimasuni inissiisarnermi maleruagassanik ilaneqarluni, taamaasiornikkut qimminik qimuttunik qeqertamiititsisarnermi qimmit pitsaanerpaamik atugassa qarnissaat qulakkeerniarneqarluni.

Qimmit qimuttut ataatsimoortinneqartalernissaanik nutaamik piumasqaateqartoqalissaaq, taamaasiornikkut qimmit qimmeqatigiinni qimmeqatimillu allat akornanni uumanissaminnut sungiussitinneqassapput, qimmeqatigiillu akornanni uumanissaminnut piginnaasatik annertusarlugit. Tamatuma saniatigut siunnersuutigineqarpoq qimussimik sukkaniutsitsisarnerit erseqqinnerusumik maleruagassiuunneqarnissaat kiisalu taamatut sukkaniuttoqartillugu angusarissaarnissaq siunertaralugu akuutissanik inerteqqutaasunik atuisoqartarsinnaanerata inerteqqutigineqalernissaa.

Qimminik qitsunnillu niueruteqartarnermut tunngatillugu inatsisissatut siunnersuut aqqutigalugu aalajangersaasoqarpoq qimmit aammalu qimmit qimuttut piaraannik sapaatit akunnerinik arfineq pingasunik utoqqaassuseqalersimannngitsunik tunniussisarneq tunisaqartarnerlu inerteqqutaalluni aammalu qitsuaqqanik sapaatit akunnerinik aqqaneq marlunnik utoqqaassuseqalersimannngitsunik tunisaqartarneq inerteqqutaassalluni. Taamaasiortoqarpoq qimmiaqqat qitsuaqqallu arnaminnit siusinaarpallaartumik avissaartinnerisigut pissutsimikkut timikkullu ajoquserneqannginnissaat qulakkeerniarlugu.